

Bil. 42

Selasa

29 Oktober 2019



MALAYSIA

PENYATA RASMI PARLIMEN

Parliamentary Debates

KAMAR KHAS

Special Chamber

**PARLIMEN KEEMPAT BELAS
PENGAL KEDUA
MESYUARAT KETIGA**

KANDUNGAN

UCAPAN DI BAWAH USUL BERKENAAN PERKARA TADBIR KERAJAAN [P.M.17]:

- **Isu Permasalahan Bekalan Air di Kampung Bukit Kuin
dan Perkampungan Bandar Sungai Lembing**
- YB. Tuan Mohd Shahr bin Abdullah (*Paya Besar*) [Halaman 1]
- **Program Rakan Muda**
- YB. Tuan Sivakumar Varatharaju Naidu (*Batu Gajah*) [Halaman 3]

**MALAYSIA
KAMAR KHAS
PARLIMEN KEEMPAT BELAS
PENGKAL KEDUA
MESYUARAT KETIGA**

Selasa, 29 Oktober 2019

Mesyuarat dimulakan pada pukul 2.30 petang

DOA

*[Timbalan Yang di-Pertua (Tuan Nga Kor Ming)
mempengerusikan Mesyuarat]*

**UCAPAN DI BAWAH USUL
BERKENAAN PERKARA TADBIR KERAJAAN (P.M. 17)**

**Isu Permasalahan Bekalan Air di Kampung Bukit Kuin
dan Perkampungan Bandar Sungai Lembing**

2.33 ptg.

Tuan Mohd Shahar bin Abdullah [Paya Besar]: *Bismillahir Rahmanir Rahim. Assalamualaikum warahmatullah wabarakatuh.* Terima kasih Tuan Yang di-Pertua dan terima kasih Yang Berhormat Timbalan Menteri.

Saya ingin membangkitkan isu permasalahan bekalan air di Kampung Bukit Kuin dan perkampungan di sekitar Bandar Sungai Lembing Kuantan, Pahang. Isu setempat yang saya bangkitkan ini berhubung kait dengan masalah bekalan air harian rakyat Paya Besar khususnya masyarakat di DUN Sungai Lembing.

Tuan Yang di-Pertua, untuk makluman masalah bekalan air tidak stabil berlaku di kawasan Bukit Kuin yang melibatkan sejumlah 500 akaun adalah disebabkan oleh beberapa perkara yang menjejaskan pengguna di kawasan tinggi yang mana menggunakan bekalan air dari loji air Semambu disalurkan terus kepada penduduk di kawasan tersebut. Manakala masalah bekalan air yang tidak stabil yang berlaku di perkampungan Bandar Sungai Lembing melibatkan kawasan Kampung Seberang, Kampung Kolong Pahat, Kampung Air Terjun dan Kampung Sungai Arang Sungai Lembing yang melibatkan sejumlah 1,800 akaun adalah disebabkan oleh beberapa faktor yang menjejaskan pengguna di kawasan tinggi yang menggunakan bekalan air Sungai Lembing disalurkan terus kepada penduduk di kawasan tersebut.

Masalah paip pecah ini sering timbul berikutan rangkaian paip agihan yang terdiri daripada pelbagai jenis paip dengan jarak 63 kilometer bagi bekalan seluruh kawasan Sungai Lembing dan sekitarnya. Paip jenis *asbestos cement* yang digunakan di Kampung Bukit Kuin dan kawasan Perkampungan Bandar Sungai Lembing yang sudah usang di mana telah menjangkau usia 30 tahun sering menyebabkan masalah paip pecah yang mengakibatkan gangguan bekalan air kepada pengguna di mana pihak Pengurusan Air Pahang Sdn. Bhd. (PAIP) perlu mengawal tekanan bagi mengatasi masalah tersebut.

Tuan Yang di-Pertua, dalam mengatasi permasalahan ini, Pengurusan Air Pahang Sdn. Bhd. (PAIP) telah mengambil langkah yang proaktif dengan membaiki semula paip yang pecah akan tetapi langkah ini bersifat hanya sementara. Paip tersebut akan pecah semula dan menyebabkan bekalan air kembali terputus seterusnya menyukarkan penduduk setempat untuk melakukan urusan harian mereka. Justeru itu, saya ingin pihak kementerian menyelesaikan permasalahan yang timbul ini dengan menggantikan paip air utama yang usang ini kepada yang baharu.

Saya berharap kerajaan dapat mengkaji kaedah dan penyelesaian yang terbaik bagi mengatasi masalah ini. Saya juga berharap isu ini dapat diselesaikan dengan kadar yang segera memandangkan ia melibatkan keperluan asas penduduk. Sekian sahaja, terima kasih Tuan Yang di-Pertua dan terima kasih Yang Berhormat Timbalan Menteri.

2.36 ptg.

Timbalan Menteri Air, Tanah dan Sumber Asli [Tengku Zulpuri Shah bin Raja Puji]:
Terima kasih Tuan Yang di-Pertua dan terima kasih sahabat saya, Yang Berhormat Paya Besar. *Bismillahir Rahmanir Rahim. Assalamualaikum warahmatullahi wabarakatuh* dan salam sejahtera.

Tuan Yang di-Pertua, sebelum saya menjawab soalan Yang Berhormat Paya Besar, saya ingin menarik perhatian Yang Berhormat terhadap keputusan Mesyuarat Jemaah Menteri pada 15 Mei 2019 bahawa projek-projek Bekalan Air Luar Bandar pada masa hadapan akan dilaksanakan oleh Kementerian Pembangunan Luar Bandar melalui peruntukan secara geran. Dalam kes Bukit Kuin dan Sungai Lembing Kuantan, kementerian telah membuat semakan dengan Majlis Perbandaran Kuantan dan disahkan bahawa kedua-dua kampung tersebut dikategorikan sebagai luar bandar seperti yang diwartakan dalam Rancangan Tempatan Daerah Kuantan.

Bagi mengatasi masalah bekalan air Kampung Kuin, Kuantan, pihak PAIP sedang menyediakan kertas kerja untuk cadangan kerja-kerja menaik taraf sistem bekalan air di Kampung Bukit Kuin. Antara skop kerja yang dicadangkan ialah membina tangki simpanan yang lengkap

dengan sistem pam dan pemasangan paip dengan anggaran kos projek RM7 juta. Projek ini dijangka dapat menambah kapasiti simpanan bekalan bagi kampung tersebut dari 182,000 liter kepada 750,000 liter.

Bagi mengatasi masalah bekalan air di perkampungan Bandar Sungai Lembing pula, terdapat cadangan permohonan program menaik taraf paip air dan sistem loji rawatan air perkampungan Bandar Sungai Lembing dengan anggaran kos RM30 juta. Justeru, kementerian ingin mencadangkan supaya pihak Pengurusan Air Pahang Berhad (PAIP) mengemukakan permohonan projek cadangan mengatasi masalah bekalan air Kampung Bukit Kuin dan Sungai Lembing, Kuantan ini kepada KPLB untuk tindakan seterusnya. Terima kasih.

Program Rakan Muda

2.39 ptg.

Tuan Sivakumar Varatharaju Naidu [Batu Gajah]: Terima kasih Tuan Yang di-Pertua dan terima kasih juga saya ucapkan kepada Menteri Belia dan Sukan yang sudi datang menjawab soalan saya pada petang ini.

Tuan Yang di-Pertua, program Rakan Muda telah dilancarkan pada 29 Oktober 1994 yang bertujuan untuk melahirkan generasi muda yang berpotensi tinggi di mana berupaya untuk mendukung matlamat pembangunan negara. Program Rakan Muda fasa 1 mempunyai empat fasa iaitu fasa pengenalan, fasa pembangunan, fasa pemantapan dan fasa pengembangan.

Fasa pengenalan bertujuan untuk menampilkan kesedaran atau minat generasi muda untuk menyertai pelbagai aktiviti dalam sembilan gaya hidup yang ditawarkan.

Kedua ialah fasa pembangunan yang bertujuan untuk menumpukan kepada pengisian program dengan memberikan tumpuan kepada menangani masalah sosial remaja.

■1440

Ketiga ialah fasa pemantapan yang memberi peluang penglibatan kepada masyarakat untuk meningkatkan sokongan kepada program Rakan Muda.

Fasa terakhir pula ialah fasa pengembangan yang menjadi salah satu institusi sosial yang penting dengan kemudahan infrastruktur yang lengkap di seluruh negara.

Program Rakan Muda fasa II pula merupakan program yang dilaksanakan berdasarkan transformasi falsafah pelaksanaan daripada fokus individu kepada fokus komuniti dengan 7 gaya hidup yang merangkumi waja diri, masyarakat, cinta alam, wira usaha, kecergasan, seni budaya

dan inovasi. Manakala pengenalan tiga program baru pula ialah sukarelawan, wawasan desa dan jiran muda.

Begitu banyak telah diperkatakan tentang program Rakan Muda pada masa lalu tetapi kini ianya senyap dan sepi. Adakah kerajaan berminat untuk memperkasakan program ini? Selain itu, apakah polisi kerajaan tentang program Rakan Muda dan adakah ianya mempunyai satu hala tuju yang jelas di bawah kerajaan baru ini. Adakah kerajaan bercadang untuk membuat penjenamaan semula atau terdapat program baharu untuk menggantikan program Rakan Muda. Adakah KBS tidak mempunyai peruntukan yang mencukupi untuk mengerakkan program ini? Mohon penjelasan Menteri. Terima kasih.

2.41 ptg.

Menteri Belia dan Sukan [Tuan Syed Saddiq bin Syed Abdul Rahman]: Terima kasih Tuan Yang di-Pertua dan terima kasih Yang Berhormat Batu Gajah.

Tuan Yang di-Pertua, untuk makluman Ahli Yang Berhormat, program Rakan Muda masih lagi aktif dilaksanakan sehingga kini oleh Kementerian Belia dan Sukan serta mendapat penyertaan ramai remaja di negara ini. Program yang dilaksanakan sejak tahun 1994 itu menjadi agenda penting bagi memenuhi aktiviti gaya hidup remaja di seluruh negara. Statistik menunjukkan bahawa program Rakan Muda telah mencatatkan penyertaan keseluruhan seramai 15.42 juta remaja yang berumur 15 hingga 25 tahun sejak tahun 1994.

Sehingga kini, program Rakan Muda telah berjaya menekankan elemen-elemen pembangunan belia positif seperti patriotisme, kesukarelaan, berkeyakinan, gaya hidup sihat, moral yang mulia serta memenuhi keperluan remaja untuk terlibat membuat perubahan serta sumbangan positif kepada komuniti dan masyarakat.

Kewujudan program Rakan Muda sejak 24 tahun ia dilancarkan merupakan satu rentetan hasil penemuan kajian tingkah laku lepak di kalangan remaja pada tahun 1994. Dapatan kajian tersebut telah membantu pihak KBS dalam merencanakan program yang sesuai untuk golongan remaja bagi mengatasi masalah lepak dan masalah sosial yang kian timbul.

Program Rakan Muda telah diiktiraf sebagai sebuah program pembangunan sosial dengan tumpuan untuk melahirkan generasi pewaris yang sempurna, bertanggungjawab, aktif, berkeyakinan dan berupaya mengawal diri serta menghapuskan amalan-amalan negatif seperti melepak dan sebagainya. Pendekatan pelaksanaan program Rakan Muda adalah berdasarkan lapan gaya hidup yang digubal bagi memenuhi cita rasa remaja.

Program Rakan Muda ini telah dijenamakan semula pada 29 Mei 2007 dengan pendekatan baharu bersesuaian dengan hala tuju dan keperluan Misi Nasional Negara. Pelaksanaan program

Rakan Muda melibatkan lebih ramai pemimpin masyarakat di semua peringkat dan kawasan di samping memperkukuhkan lagi kerjasama dengan beberapa agensi kerajaan yang berkaitan. Program ini lebih menumpukan kepada konsep, 'Individu kepada Komuniti'.

Pada tahun 2015, Rakan Muda telah dijenamakan semula dengan berdasarkan konsep '*Showcase of Talent*' iaitu penyerlahan bakat golongan muda di mana belia lebih berpeluang untuk menyumbang idea dengan lebih terbuka bagi direalisasikan. Program Rakan Muda yang diperkenalkan sejak 24 tahun yang lalu masih kekal dilaksanakan disebabkan kerelevanannya dengan tuntutan pembangunan diri remaja itu sendiri.

Antaranya adalah program pembentukan karakter dan sahsiah seperti Rakan Muda Ramadan, Anugerah Remaja Perdana, Sekretariat Rakan Muda IPT, Projek Angkat dan Upaya (PADU) dan aktiviti Gaya Hidup Rakan Muda. Pembangunan dan pembentukan sikap dapat dilihat melalui kesan selepas pelaksanaan program. Misalnya penerima GOLD Award ARPRM kini menjadi CEO syarikat, pentadbir kerajaan menurut rekod alumni GOLD Award seramai 82 orang berjaya dalam bidang masing-masing.

Selain itu, program Rakan Muda juga telah membawa remaja menembusi ke peringkat antarabangsa melalui program MYCorps yang merupakan program Sukarelawan Belia Antarabangsa Malaysia di mana ia memberikan penempatan bertempoh kepada sukarelawan belia bersama komuniti antarabangsa yang memerlukan bantuan dan khidmat sokongan dalam konteks pembangunan komuniti, sosial, kesihatan, alam sekitar dan ekonomi.

Program ini telah dilaksanakan di Benua Asia dan Benua Afrika iaitu Kemboja, Jordan, Turki, Lubnan, Sri Lanka, Bangladesh, Tanzania, Uganda, Kenya, Sudan, Malaysia, Filipina, Laos, Indonesia dan Timor-Leste yang telah berjaya melahirkan lebih 348 sukarelawan berprestij. Kejayaan program ini dapat dilihat melalui penglibatan alumni MYCorps dalam sektor ketiga dan melaksanakan inisiatif-inisiatif program kesukarelawanan setelah mengikut program MYCorps.

Berdasarkan Dasar Belia Malaysia, fokus utama bagi program Rakan Muda pada ketika ini adalah pembangunan potensi identiti dan kendiri belia awal serta kesukarelawanan yang menyasarkan kepada 6 kumpulan sasaran belia iaitu belia bersekolah, belia pengajian tinggi, belia massa, belia Malaysia antarabangsa, perkumpulan belia dan belia berisiko meliputi belia awal 15 hingga ke 18 tahun dan belia pertengahan, 19 hingga 24 tahun.

Lima bidang keutamaan yang menjadi fokus utama inisiatif-inisiatif Rakan Muda akan memberi tumpuan kepada elemen kenegaraan dan jati diri, gaya hidup sihat dan sejahtera, kepimpinan, kesukarelaan dan masyarakat sivil dan pengiktirafan. Kesemua inisiatif tersebut mensasarkan pemantapan belia dari aspek menyerlahkan potensi diri, identiti, hubungan sosial, pembangunan kendiri, mengurangkan tingkah laku devian dan meningkatkan sosialisasi politik.

Kesemua elemen tersebut di atas dapat diukur pencapaiannya berdasarkan Skor Indeks Belia Malaysia yang dilaksanakan oleh Institut Penyelidikan Pembangunan Belia KBS (IYRES).

Bagi tahun 2020, KBS telah merangka dan merancang untuk melaksanakan program-program berikut iaitu:

- (i) Rakan Muda Aktif;
- (ii) Anugerah Remaja Perdana Rakan Muda;
- (iii) Rakan Muda Ramadhan;
- (iv) Inspirasi Anak Muda;
- (v) MYCorps;
- (vi) Rakan Muda *Day Out*;
- (vii) Rakan Muda IPT@Komuniti;
- (viii) Rakan Muda @Komuniti;
- (ix) Suara Anak Muda @IPT;
- (x) Ekspresi Rakan Muda;
- (xi) Rakan Muda Klik; dan
- (xii) Rakan Muda *Care*.

Perancangan ini adalah mengambil kira kepada fokus utama program Rakan Muda iaitu penyerlahan potensi remaja selain memastikan program Rakan Muda sentiasa relevan kepada golongan sasar. Terima kasih Yang Berhormat.

Timbalan Yang di-Pertua [Tuan Nga Kor Ming]: Terima kasih Yang Berhormat Menteri. Ahli-ahli Yang Berhormat, Mesyuarat Kamar Khas hari ini ditangguhkan sehingga jam 2.30 petang, hari Rabu 30 Oktober 2019.

[Kamar Khas ditangguhkan pada pukul 2.47 petang]